

POPERA GA COROCHAWA JEXMAGÜXÛ GA JAXÖGÜXÛTANÜWA NAMUXÛ GA PAURU

**Pauru rü nüxü narümoxê ga jema
jaxögüxü ga Corochawa jexmagüxü**

1 ¹⁻²Pa Chaueneëgü ja Corochaarü
Īānewa Ngëxmagüxex, chama i
Pauru rü wüxigu namaã i taeneë i
Timúteu nixĩ i pexçax tanaxümatüxü i
nhaã popera. Rü chama chixĩ i Tupana
choxü jaxuxü na Ngechuchu ja Cristu
choxü muxüçax na nüxü chixuxüçax i
norü ore. Rü pexçax chanaxümatü i
guxãma i pema ja chaueneëgü ja
aixcuma Tupanaärü duüxügü ixigüxe rü
Cristuaxü jaxögüxe. Rü chanaxwaxe i
Tanatü ja Tupana pexü narüngüxêê na
meã pegümaã pemaxëxüçax rü
petaãëgüxüçax.

**Pauru rü jema jaxögüxüçax
najumuxê**

³Rü guxüguma i ngëxguma pexçax
tajumuxëgügu, rü moxê nüxna taxã ja
Tupana ja Nanatü ja törü Cori ja
Ngechuchu ja Cristu. ⁴Rü ngëmaãcü
tanaxü erü marü nüxü tacuáchiga na
nhuxãcü aixcuma meã Ngechuchu ja
Cristuaxü pejaxögüxü, rü aixcuma nüxü

pengechaügüxü i guxüma i ngëma
duüxügü i Tupanaärü ixigüxü. ⁵Rü nüxü
tacuaxgü na ngëmaãcü meã
Tupanapexewa pemaxëxü erü
penajauxgüchaü i ngëma mexügü i
Tupana pexü namaã nguxüxü i
douxügüxü i naãnewa. Rü nhuxma rü
meã ípenanguxêê na penajauxgüxüçax i
ngëma mexügü jerü marü nüxü pexĩnüê
ga Tupanaärü ore i mexü i aixcuma
ixixü. ⁶Rü ngëmatama ore i mexü ga
pexütawa nguxü, rü guxüwama nangu i
nhuxmax. Rü guxüwama ningüchigü rü
duüxügüärü maxüxü naxüchicüü, jema
perü maxüxü na naxüchicüüxüüü ga
jexguma nüxü pexĩnüëgu rü nüxü
pecuaxgügu na nhuxãcü Tupana
aixcuma pexü na ngechaüxü rü pexü
rüngüxëêchaüxü. ⁷Rü ngëma ore i mexü
nixĩ ga pexü nangüxëêxü ga Epáfra ja
taeneë ja nüxü ingechaügücü ja wüxigu
tomaã Tupanaärü orewa puracücü. Rü
nüma rü Cristuarü puracütanüxü ja
mecü nixĩ, rü nüma nixĩ i tochicüü pexü
nangüxëêxü. ⁸Rü nüma ja Epáfra nixĩ i
tomaã nüxü jaxuxü i pechiga na nhuxãcü
Tupanaãê i Üünexüärü ngüxëêmaã

choxũ pengechaũgũxũ. ⁹Rũ ngẽmacax i toma ga noxritama pexũ tacuáchigagu, rũ taguma nũxũ tarũchaue na pexçax tajumuxẽgũxũ. Rũ guxũguma Tupanana naxçax tacagũ na meã pexũ nũxũ nacuaxẽẽxũçax i ngẽma nũma nanaxwaxexũ na penaxũxũ. Rũ nũxna naxçax tacagũ na pexna naxããxũçax i nagũxũraũxũ i cuax i Naãe i Ūunexũwa ne xũ. ¹⁰Rũ nũxna naxçax tacagũ na meã tórũ Cori naxwaxexũãcũma na pemaxẽxũçax rũ guxũguma penaxũxũçax i ngẽma nũma nanaxwaxexũ. Rũ nũxna naxçax tacagũ na pexũ natauxchaxẽẽãxũçax na togũxũ perũngũxẽẽgũxũçax rũ guxũ i ngunexũgu jexeraãcũ Tupanaxũ na pecuaxgũxũçax. ¹¹Rũ nũxna naxçax tacagũ na norũ pora i mexẽchixũmaã pexũ naporaexẽẽxũçax, na namaã peporaexũçax i guxũma i guxchaxũgũ rũ jaxna namaã pexĩnũẽxũçax. ¹²Rũ nhuxmachi tanaxwaxe i taãẽãcũma Tanatũ ja Tupanana moxẽ pexã, erũ nũma pexũ nimexẽẽgũ na pema rũ ta penajauxgũxũçax i ngẽma mexũgũ i naxũtawa ngẽxmagũxũ i nũma tá nũxna naxãxũ i ngẽma duũxũgũ i noxrũ ixĩgũxũ. ¹³Jerũ nũma ga Tupana rũ marũ Chatanãmexẽwa tũxũ ñangũxũxẽẽ rũ Nane ja nũxũ nangechaũcũmexẽwa tũxũ nangẽxmagũxẽẽ. ¹⁴Rũ guma Nanegagu nixĩ ga tũxũ namaxẽẽxũ rũ tũxũ nũxũ nangechaũxũ ga tórũ pecadugũ.

**Rũ jexguma pecaduçax najuxgu ga
Cristu rũ Tupana nũgũmaã
nanangũxmũẽxẽẽ ga duũxũgũ**

¹⁵Taguma texé Tupanaxũ tadau, notürũ nũma rũ núma nanamu ga Nane

na duũxũgũ nũxũ daugũxũçax rũ nũxũ nacuaxgũxũçax na nhuxãcũ na jiĩxũ i nũma ja Tupana. Rũ naxũpa i guxũma i tacũ i nhuxma ngẽxmaxũ, rũ nũxĩra najexma ga Tupana Nane. ¹⁶Rũ Nanexũ nixĩ ga namuxũ ga Tupana na naxũãxũçax ga guxũma i tacũ i nhuxma ngẽxmaxũ i dauxũgũxũ i naãnewa rũ nhama i naãnewa, rũ guxũma i ngẽma nũxũ idauxũ rũ ngẽma tama nũxũ idauxũ. Rũ jemaãcũ nanaxũ ga guxũma ga norũ orearũ ngeruũgũ i dauxũcũãxãrũ ãẽxgacũgũ rũ guxũma ga ngoxogũarũ ãẽxgacũgũ. Rũ jemaãcũ nanaxũ ga guxũma na nũxũ jacuaxũũgũxũçax. ¹⁷Rũ naxũpa i guxũma i tacũ i nhuxma ngẽxmaxũ, rũ Cristu rũ marũ nũxĩra najexma. Rũ nagagu nixĩ i meã inanuxũ i guxũma erũ nũma nixĩ i namaã inacuáxũ. ¹⁸Rũ nũma ja Cristu rũ naẽru nixĩ i guxũma i ngẽma jaxõgũxũ. Rũ nũma nixĩ ga naxũãxũ rũ nũxna naxããxũ ga maxũ. Rũ nũma nixĩ ga nũxĩra juwa ñadaxũ na guxũãrũ ãẽxgacũ jiĩxũçax. ¹⁹Rũ Cristu rũ Tupanaxũchi nixĩ, jerũ jemaãcũ nanaxwaxe ga Tupana. ²⁰Rũ Tupana rũ nhama ga naãnewa nanamu ga Cristu na curuchagu pecaduçax najuxũçax. Rũ jemaãcũ nixĩ ga Tupana nũgũmaã nangũxmũẽẽxũ ga guxũma i nhama i naãnewa ngẽxmaxũ rũ guxũma i dauxũgũxũ i naãnewa ngẽxmaxũ. Rũ jemaãcũ nanaxũ ga Tupana jerũ jemaãcũ nanaxwaxe. ²¹Rũ pema ga ũpa rũ tama Tupanamũcũgũ peixĩgũ jerũ aixcuma norũ uwanũgũ pegũ peixĩgũxẽẽ jerũ chixexũgu perũxĩnũẽ rũ chixexũ pexũe. ²²Notürũ i nhuxma ja Tupana rũ nũgũmaã pexũ narũngũxmũẽẽẽ na

namüciügü i mexũ peixĩgũxũcax. Rũ jemaãcü nanaxũ ga Tupana ga jexguma Cristu duũxũxũ ixĩxgu rũ curuchawa ngũxũ jangexgu rũ jexma najuxgu. Rũ jemaãcü naju ga Cristu na nügũxũtawa pexũ nagagũxũcax rũ napexewa pemexũcax rũ nataxuxũcax i perũ chixexũ. ²³Notürũ ngẽma na pengugũxũcax, rũ penaxwaxe na meã pejaxõgüechaxũ rũ meã naga pexĩnũẽxũ rũ taguma nüxũ perũxoexũ i ngẽma norũ ore i mexũ ga marũ nüxũ pexĩnũẽxũ. Rũ jema ore ga marũ nüxũ pexĩnũẽxũ, rũ ngẽmatama ore nixĩ i nüxũ chixuxũ i chamax. Rũ nhuxma rũ guxũ i naãnewa nixĩ i nüxũ jaxugüexũ.

**Tupana rũ Pauruxũ namu na
guxũma ga jaxõgũxũxũ
nangũxẽẽxũcax**

²⁴Rũ nhuxma rũ woo pexcax ngũxũ chingexgu rũ chataãẽ erũ nüxũ chacuax rũ nhaã chaxunemaã chama rũ ta chajanguxẽẽ ga jema ngũxũ ga Cristu ingexũ naxcax i norũ duũxũgü i jaxõgũxũ. ²⁵Rũ nhuxma ja Tupana rũ choxũ namu na nüxũ charungũxẽẽxũcax i guxũma i ngẽma norũ duũxũgü i jaxõgũxũ. Rũ perũ mexũcax nixĩ i choxũ namuxũ na guxũwama meã nüxũ chixuxũcax i norũ ore. ²⁶⁻²⁷Rũ ngẽma Tupanaãrũ ore rũ nhanagürũ:

“Rũ Cristu rũ pewa nangẽxma i nhuxmax, rũ nagaguxicatama nixĩ i pexũ nangẽxmaxũ i pechica i dauxũguxũ i naãnewa i ngextã ínamexẽchixũwa”, nhanagürũ. Rũ jema nuxcũmaxũgũxũ ga duũxũgü rũ tama nüxũ nacuaxgü ga jemachiga, notürũ nhuxma ja Tupana rũ

norũ duũxũgũxũ nüxũ nacuaxẽẽ. Erũ nüma ja Tupana rũ norũ duũxũgũxũ nüxũ nadauxẽẽchaũ na nhuxãcü poraãcü pexũ nangechaũxũ rũ pexũ nangũxẽẽxũ i guxãma i pema i tama Judéugü ixĩgũxe. Rũ nhuxma i pema na woo tama Judéugü peixĩgũxũ, notürũ pema rũ ta pexũ nangẽxma i pechica i dauxũguxũ i naãnewa erũ Cristuaxũ pejaxõgü. ²⁸Rũ nhuxma i toma rũ Cristuxũ nixĩ i tixuxũ. Rũ guxũ i torũ cuaxmaã guxũma i duũxũgũxũ tixucuxẽgü rũ meã tanangüexẽẽ na ngẽmaãcü Cristugagu ngearũ chixexũãxũ Tupanaxũ tawéxũcax. ²⁹Rũ ngẽmatama puracü nixĩ i nawa poraãcüxũchima chapuracũamaxũ woo tacü rũ guxchaxũ chauxcax ínguxgu. Rũ guxũma i ngẽma pora i Cristu choxna ãxũ i chawa ngẽxmaxũ nixĩ i choxũ poraxẽẽxũ na chanaxũamaxũcax i ngẽma puracü.

2 ¹Pa Chaueneẽgũx, chanaxwaxe i nüxũ pecuax na nhuxãcü poraãcü pexcax chapuracũxũ. Rũ ngẽxgumarũ ta chanaxwaxe i nüxũ pecuax na nhuxãcü poraãcü chapuracũxũ naxcax i ngẽma taeneẽgü i Raodichéaarũ íãnewa ngẽxmagũxũ rũ guxũma i petanũxũgü i taguma choxũ daugũxũ. ²Rũ ngẽmaãcü poraãcüxũchima chapuracü na nüxũ rũ ta chanangũchaũxẽẽxũcax. Erũ chanaxwaxe i guxũma aixcuma nügü nangechaũgü rũ nüxũ nangẽxma i ngẽma mexũ i cuax i aixcuma ixĩxũ. Rũ ngẽmaãcü tá meãma nüxũ nacuaxgü ga jema noxri Tupanaxĩcatama nüxũ cuaxũ. Rũ jima rũ Cristutama nixĩ. ³Rũ nüma nixĩ i nüxũ nangẽxmaxũ i guxũma i cuax i aixcuma mexũ. Rũ nüma nixĩ i

taxçax nangoxēēāxũ i Tupanachiga. ⁴Rũ pemaã nũxũ chixu i ngēma ore erũ tama chanaxwaxe na texé pexũ womũxēēgũxũ namaã i taçũ rũ ore i chixexũwa pexũ gagũxũ. ⁵Rũ woo na tama ngēma petanũwa changēmaxũ, notürũ chauãēwa rũ poraãcũ pegu charũxĩnũ. Rũ wũxi i chorũ taãe nixĩ na nũxũ chacuáxũ na nhuxãcũ meã pegũ ipenuxũ na meã pegũmaã ipecuáxũçax rũ nhuxãcũ tama nũxũ perũxoexũ na Cristuaxũ pejaxõgũxũ.

**Nhuxma na Cristuarũ ixĩgũxũ rũ
ngexwacaxũxũ i maxũ tũxũ
nangēxma**

⁶Rũ pema ga noxri rũ meãma tórũ Cori ja Ngechuchu ja Cristuxũ pejaxugũ. Rũ nhuxma rũ jema noxri meãma na penajauxgũxũrũũ rũ name nixĩ i guxũguma nũxna penaxã i perũ maxũ na nũma pexũ namaã inacuáxũçax. ⁷Rũ wũxi i nanetũ nanaxwaxe i naxchũmaxã na nataixũçax rũ na namaxũxũçax. Rũ ngēxgumarũũ ta i pema rũ penaxwaxe na meã Cristuna pejaxũxgũxũ na meã nawa peijaetanũxũçax rũ meã naxçax pemaxēxũçax rũ meã nũxũ pejaxõgũamaxũxũçax jema noxri Epáfra pexũ ngũxēēgurũũ. Rũ name nixĩ i guxũguma Tupanana moxē pexã. ⁸⁻⁹Rũ naxçax pexuãēgũ i ngēma duũxũgũ i pexũ womũxēēgũchaũxũ! Rũ tama name i nũxũ iperũxĩnũe i ngēma norũ ore i tama aixcuma ixĩxũ rũ taxuwama mexũ. Erũ ngēma duũxũgũ rũ pexũ nangũxēēchaũ na nagu pexĩxũçax i ngēma nacũmagũ ga nuxcũmaxũgũxũ ga duũxũgũ nagu ixũ. Rũ nhama i naãneãrũ nguxēētae nixĩ i inaxĩnũēxũ.

Notürũ tama aixcuma Cristuchiga nixĩ i ngēma pexũ nangũxēēxũ. Rũ name nixĩ i nũxna peixĩgachi i guxũma i ngēma nguxēētaerũgũ i chixexũgũ rũ Cristuwe perũxĩ. Erũ Cristu rũ Tupanaxũchi nixĩ rũ guxũma i Tupanaãrũ pora rũ Cristuwa nangēxma. ¹⁰Rũ nhuxmax, rũ Tupanaãrũ maxũ rũ norũ pora rũ aixcuma pewa nangēxma erũ namexwa pengēxmagũ ja Cristu ja namaã icuácũ i guxũma i dauxũcũãxãrũ ãēxgacũgũ rũ guxũma i ngoxogũarũ ãēxgacũgũ. ¹¹Rũ ngēma Judēgũ rũ nũgũ ínawiechaxmũpexechiraũgũ na Tupanapexewa jamexũçax. Notürũ ngēxguma Cristuaxũ jaxõgũgu rũ tama ngēmaãcũ tamaã nanaxũ ja Cristu na imexũçax. Erũ nũma ja Cristu rũ tórũ maxũwa napuracũ rũ tũxũ ínanguxũxēē nawa i taxũneãrũ ngũchaũgũ. Rũ ngēmaãcũ nixĩ i tũxũ jamexēēxũ na Tupanapexewa imexũçax. ¹²Rũ jexguma ípebaiũgu, rũ Cristu na itãxũrũũ jexma natax ga jema nuxcũmaxũxũ ga perũ maxũ. Rũ jema Cristu na írũdaxũrũũ rũ pema rũ ta penajaxu i maxũ i ngexwacaxũxũ, jerũ pejaxõgũ na Tupana norũ poramaã Cristuxũ írũdaxēēxũ. ¹³Rũ ũpa ga pema rũ tama aixcuma pexũ najexma ga maxũ i taguma gũxũ jerũ pepecaduãxgũ rũ pexeneãrũ ngũchaũ pexũgũ. Notürũ i nhuxma rũ Cristuxũ namaxēēxũrũũ pexũ namaxēxēē ja Tupana erũ Cristuarũ duũxũgũ peixĩgũ. Rũ Tupana rũ marũ Cristugagu tũxũ nũxũ nangechaũ i guxũma i tórũ pecadugũ. ¹⁴Rũ noxri rũ tachixe jerũ tama aixcuma naga taxĩnũe ga jema mugũ ga Muísé tũxna ãxũ, rũ tórũ pecadugũ rũ juwa

tũxũ nagagũ. Notũrũ ga Cristu rũ curuchagu tórũ pecaducax naju, rũ jemaãcü Tupana tũxũ najangutanũxẽẽ ga jema tórũ pecadugũ. ¹⁵Rũ jexguma curuchagu najuxgu ga Cristu, rũ jexguma nixĩ ga Chatanáxũ naporamaẽxũ ga Tupana. Rũ jexguma nixĩ ga guxũ ga duũxũgũpexewa Chatanáxũ naxãnexẽẽxũ nhama wũxi i churaragũarũ ãẽxgacũ i norũ uwanũ i nũxũ naporamaẽxũxũ naxãnexẽẽxũrũ.

Name nixĩ i naxcax tadaugũ i ngẽma mexũgũ i dauũxũgũ i naãnewa ngẽxmagũxũ

¹⁶Rũ nhuxma rũ taxuũcaxma tũxcũũ pexũ nixu i ngẽma Judéugũ ega woo tama naxrũũ penaxũxgux. Nũmagũ rũ nhuxre i õnagũxicatama nangõxgũ, rũ nhuxre i axchiũxicatama nixaxgũ, rũ nhuxre i petaarũ ngunexũgũ naxauregũ na ngẽmaãcü Tupanaxũ jacuãxũũgũxũcax. Rũ nangẽxma i norũ peta i gucũ ja taunecũgu Tupanacax naxauregũxũ rũ togũ i petagũ i gucũ ja tawemacũgu naxauregũxũ. Rũ nũxũ nangẽxma i nacũmagũ na nhuxãcü ngũxchigaarũ ngunexũgũ naxauregũxũ. ¹⁷Rũ aixcuma jema nuxcũmaxũgũxũ ga Judéugũ rũ nanaxauregũ ga jema nacũmagũ jerũ ga Cristu rũ taũta ínangu ga jexguma. Notũrũ i nhuxma rũ marũ ínangu ja Cristu rũ tórũ pecaducax naju. Rũ nhuxma rũ name nixĩ na naga ixĩnũẽxũ rũ tama nagu ixĩxũ i ngẽma nuxcũmaxũgũxũ i nacũmagũ. ¹⁸Rũ tãũxũtãma naga pexĩnũẽ i ngẽma duũxũgũ i nũxũ ixugũxũ na ipejarũtauxexũ ega tama dauũcũãx i orearũ ngeruũgũxũ

peicuãxũũgũgu! Nũmagũ rũ nũgũ ínaruĩfragũneta rũ nũgũ nixugũ na jangõxetũgũxũ. Rũ noxrũtama cuãxmaãmare nũgũ nicuãxũũgũ. ¹⁹Notũrũ i nũmagũ rũ tama aixcuma naga naxĩnũẽ ja jima taeru ixĩcü ja Cristu ja tũxũ poraexẽẽcü rũ tũxũ ijaetanũxẽẽcü i tórũ õwa i guxãma i jixema i norũ duũxũgũ ixĩgũxe. Rũ nũma ja Cristu nixĩ i wũxigu tũxũ naxĩnũẽẽẽxũ i wũxichigũ i jixema ngẽma Tupana naxwãxexũrũ. ²⁰Rũ jexguma najuxgu ga Cristu rũ jexma naju ga nuxcũmaxũxũ ga peru maxũ, rũ jexma najarũxo ga guxũma ga nuxcũmaxũgũxũ ga pecũmagũ i nhama i naãnecũãx i duũxũgũ nagu rũxĩnũẽxũ. Rũ ngẽmacax i nhuxmax rũ tũxcũũ nixĩ i nhama i naãnecũãx maxẽxũrũũ pemaxẽxũ i pemax, rũ tũxcũũ nixĩ i ngẽma Judéugũcũmagu pexĩxũ? ²¹Rũ nũmagũ i Judéugũ rũ nũxũ nixugũe rũ nhanagũrũgũ:

“Tama name i nũxũ cuingõgũ i ngẽã, rũ tama name i cunangõx i jea, rũ tama name i cunajaxu i ngẽma”, nhanagũrũgũ. ²²Notũrũ guxũma i ngẽma nacũmagũ rũ paxa tá inajarũxo eru duũxũgũarũ nixĩgũ. Rũ ngẽma pexũ namuxũ rũ duũxũgũarũ mugũmare nixĩ. Rũ ngẽma pexũ nangũexẽẽxũ rũ duũxũgũarũ ngũxẽẽtaemare nixĩ. ²³Rũ guxũma i ngẽma pexũ namuxũ rũ pexcax namexcũraxũ eru pexũ naxucũxẽgũ na tacũ pexauregũxũcax, rũ meã pexenemaã ipecuãxgũxũcax. Notũrũ guxũma i ngẽma mugũ rũ tama aixcuma pexũ narũngũxẽẽ na nũxũ peruõexũcax i pexeneãrũ ngũchaũgũ.

3 ¹Rü nhuxma i pemax, rü Cristu wena maxũxũrũũ rü pexũ nangẽxma i maxũ i ngexwacaxũxũ. Rü ngẽmacax name nixĩ i naxçax pedau i ngẽma mexũgũ i dauxũguxũ i naãnewa ngẽxmaxũ i ngextá Cristu rü Tupanaãrũ tũgũnecũwawa írũtoxũwa rü namaã ãẽxgacũ i jjiixũwa. ²Rü name nixĩ i guxũguma nagu perũxĩnũẽ i ngẽma dauxũguxũ i naãnewa ngẽxmaxũ, rü tama ngẽma nhama i naãnewa ngẽxmaxũ. ³Jerũ jexguma najuxgu ga Cristu rü jexma naju ta ga nuxcũmaũxũ ga perũ maxũ. Rü nhuxma rü pexũ nangẽxma i perũ maxũ i ngexwacaxũxũ erũ Cristutanũxũ peixĩgũ rü Tupanamexẽwa pengẽxmagũ. ⁴Rü nũmatama ja Cristu nixĩ i pexũ namaxẽxẽxũ. Rü ngẽxguma wena núma nangoxgu, rü namaã tá peingõe, rü naxrũũ tá pemexẽchi.

Marũ nüxũ tarũxo i nuxcũmaxũxũ i tacũma i chixexũgũ rü tanajaxu i ngexwacaxũxũ i tórũ maxũ

⁵Rü nhuxma rü name nixĩ i nüxũ perũxoe i guxũma i nhama i naãneãrũ chixexũ i pewa ngẽxmaxũ. Rü tama name i pemaxna naĩ i ngemaã pemaxẽ, rü tama name i petena naĩ ja jatũmaã pemaxẽ. Rü tama name i penaxũ i pexeneãrũ ngũchaũ rü bai i nagu perũxĩnũẽmare. Rü tama name i pexũ nangũchaũ i tacũ rü to i chixexũgũ. Rü tama name i pegũnaxĩcatama penanuãchigũchaũ i guxũma i ngẽmaxũgũ, erũ jíxema ngẽma nacũma tũxũ ngẽxmaxẽ rü dũxwa namaã tatupanaãx. ⁶Rü guxũma i ngẽma chixexũgũçax tá nixĩ i Tupana

napocuexũ i ngẽma duũxũgũ i ngẽmaãcũ maxẽxũ rü tama naga ãnũẽchaũxũ. ⁷Rü pema ga ũpa rü penaxũ ga jema chixexũgũ, rü jemaãcũ pemaxẽ. ⁸Notũrũ i nhuxma rü name nixĩ i nüxũ perũxoe i guxũma i ngẽma na pegũchi pexaixũ, rü pegũmaã penuẽxũ, rü chixri pemaxẽxũ, rü pegũmaã peguxchigagũxũ, rü guxũma i ngẽma chixexũ i dexa i nüxũ peixuxũ. ⁹Rü tama name i pegũmaã peidoraẽ, erũ marũ ípenatax ga nuxcũmaxũxũ ga pecũma rü guxũma ga jema chixexũgũ ga ũpa pexũgũxũ. ¹⁰Rü nhuxma rü marũ penajaxu i ngexwacaxũxũ i perũ maxũ rü ngexwacaxũxũ i duũxũgũ peixĩgũ. Rü guxũ i ngunexũgu rü Tupana pexũ ningexwacaxũxẽchigũ na jexeraãcũ pemexũçax naxrũũ rü jexeraãcũ nüxũ na pecuãxgũxũçax ja Tanatũ ja Tupana ja maxũ tũxna ãcũ. ¹¹Rü nhuxma rü Tupanaçax rü nüẽtama nixĩ ega Judẽu cuixĩgu rü exna tama. Rü nüẽtama nixĩ ega ícuwiechaxmũpexechiraũgu rü exna tama. Rü nüẽtama nixĩ ega tacũ rü nachĩũãnecũãx i duũxũ cuixĩgu, rü exna tacũ rü duũxũ cuixĩgu. Rü nüẽtama nixĩ ega wũxi i coriarũ duũxũ cuixĩgu, rü exna taxũxearũma duũxũ cuixĩgu. Erũ nhuxma rü ngẽma guxũãrũ jexera aixcuma tũxũ mexũ nixĩ na Cristu rü guxũãrũ ãẽxgacũ jíxũ rü guxãwama nangẽxmaxũ. ¹²Rü nhuxma ja Tupana rü pexũ nangechaũ i pema rü pexũ nidexechi na noxrũ peixĩgũxũçax. Rü ngẽmacax name nixĩ i guxũguma pexũ nangechaũtũmũũgũ i togũ, rü namaã pemecũmagũ, rü tauxchaãcũma nüxna penaxã, rü taguma napexewa pegũ íperũtagũ. Rü ngẽxguma woo tacũ

pemaã naxũxgux rü name nixĩ i jaxna namaã pexĩnüẽ. ¹³Rü name nixĩ i wüxichigü i pema na pegümaã jaxna pexĩnüẽxũ. Rü ngëxguma chi texẽ tacü pemaã ũxgux, rü name nixĩ i pegüxũ nüxũ pengechaũgü i ngëma. Rü jexgumarũĩ ga tórü Cori na pexũ nüxũ ngechaũxũrüũ, rü name nixĩ i togüaxũ nüxũ pengechaũgü. ¹⁴Rü guxũãrũ jexera mexũ nixĩ na pegü pengechaũgũxũ. Erü ngëxguma aixcuma pegü pengechaũgũgü rü aixcuma wüxigu tá perüxĩnüẽ, rü meã pegümaã tá pemaxẽ. ¹⁵Rü name nixĩ na pemaã inacuáxũ i ngëma taãẽ i Cristu pexna äxũ na ngëmaãcü aixcuma pegü pengechaũgũxũcax. Jerü jemacax nixĩ ga Tupana pexũ idexechixũ na wüxitanya i duũxũgü peixĩgũxũcax rü meã wüxigu perüxĩnüẽxũcax. Rü name nixĩ i moxẽ nüxna pexãgü ja Tupana. ¹⁶Rü name nixĩ i guxũguma peãẽwa nangëxma i Cristuarü ore rü taãẽãcüma naga pexĩnüẽ. Rü name nixĩ i meã peãẽxũ pecuããcüma namaã pegü pengüexẽẽ rü pegü peixucuxëgü na ngëmaãcü pegüaxũ penangüchaũxẽẽxũcax. Rü name nixĩ i aixcuma Tupanana moxẽ pexãgüãcüma naga pewijaegü i nagüxũraũxũ i norü wijaegü. ¹⁷Rü guxũma i ngëma pexũxũ rü nüxũ peixuxũ rü name nixĩ i tórü Cori ja Ngechuchuégagu penaxũ. Rü name nixĩ i ngëmaãcü Ngechuchuégagu Tanatü ja Tupanana moxẽ pexãgü.

**Tupana nanaxwaxe na meã
namaxëxũ i duũxũgü i
Cristuaxũ jaxõgũxũ**

¹⁸Pa Ngexũgü i ãtegũxũx, rü name nixĩ i petega pexĩnüẽ. Erü woetama

ngëma nixĩ i mexũ na penaxũxũ erü tórü Cori ja Cristuarü duũxũgü peixĩgü. ¹⁹Pa Jatügü i ãmaxgũxũx, rü name nixĩ i ngixũ pengechaũgü i pemaxgü. Rü tama name i ngëmaã penuẽ. ²⁰Pa Buxũgũx, rü name nixĩ i guxũwama penatü rü peega pexĩnüẽ, erü ngëma nixĩ i namaã nataãẽxũ ja tórü Cori. ²¹Pa Jatügũx, rü tama name i penanuẽxẽẽ i pexacügü. Erü ngëxguma ngëmaãcü penaxũxgux rü ngürüãchi tá nüxũ nawaxtümũũ i ngëma namaã nüxũ peixuxũ. ²²Pa Duũxũgũx i Ixããrũ Coriãxgũxũx, rü name nixĩ i guxũwama naga pexĩnüẽ i perü corigü i nhama i naãnewa pemaã icuaxgũxũ. Rü tama name i pexũ nadaugüguxicatama meã pepuracüe na ngëmaãcü penataãẽxẽẽxũcax. Notürü name nixĩ i mexũ i perü ngüchaũmaã guxũguma meã pepuracüe erü tórü Corixũ pemuũẽ. ²³Rü guxũma i ngëma perü puracü i pexũxũwa rü name nixĩ i perü ngüchaũmaã penaxũ nhama tórü Cori ja Cristuaxũ pepuracüexũrüũ rü tama i duũxũgüaxũ. ²⁴Rü marü nüxũ pecuax rü dauxũgũxũ i naãnewa rü tórü Cori ja Cristu tá pexna nanaxã i perü ãmare i maxũ i taguma gũxũ. Erü jima Cristu ja aixcuma perü Cori ixĩcüaxũ nixĩ i pepuracüexũ. ²⁵Notürü jixëma chixexũ üxe rü tá ta tanajaxu i tumaãrũ natanü naxcax i ngëma chixexũ i taxũxũ, rü aixcuma Tupana tá tüxũ napocu. Erü Tupanapexewa rü guxũma i duũxũgü rü nawüxigu, rü taxucürüwama texẽ Tupanachaxwa tinha ega chixexũ taxũxgux.

4 ¹Rü pemax, Pa Corigũx, rü name nixĩ i perü duũxũgümaã pemecümagü, rü tama penawomüxẽẽ.

¡Rü nüxna pecuaxãchie na pema rü ta pexú nangëxmaxũ ja perü Cori ja dauxũgucü! ²¡Rü guxũguma pejumuxëgü, rü pexuãëgü na tama ngextamare naxĩnũxũcax i peãë i ngëxguma pejumuxëgügu! ¡Rü Tupanana moxë pexãgü! ³¡Rü toxçax rü ta pejumuxëgü na Tupana toxú natauxchaxëëxũcax na nüxü tixuxũcax i norü ore i mexũ, rü meãma duũxũgũmaã nüxü tixuxũcax i ngëma ore ga noxri tama nüxü nacuaxgũxü i Cristuchiga! Rü ngëma oreçax nixĩ i nhuxma ichapocuxũ. ⁴Rü chanaxwaxe i chauxçax pejumuxëgü na meã duũxũgũxü nüxü chacuaxëëxũcax i ngëma ore, erü ngëma nixĩ i mexũ na chanaxũxü. ⁵Rü chanaxwaxe i meã pemaxë napexewa i ngëma duũxũgü i tama jaxögũxü. ¡Rü nhuxma na pexú natauxchaxũ, rü joxni paxa penaxũx i Tupanaãrü puracü! ¡Rü tama iperüchomare! ⁶Rü name nixĩ i guxũguma meã namaã peidexagü i ngëma togü i duũxũgü, rü mexũ i orexũ namaã peixugü. Rü ngëmaãcü tá nüxü pecuax na nhuxãcü meã penangãxũxü i wüxichigü i ngëma duũxũgü i perü ôchigacax pexna çaxũ.

**Pauru nanaguxëë ga norü popera rü
wenaxãrü jema duũxũgũxü
narümoxë**

⁷Rü nüma ja taeneë ja Tíquicu ja nüxü ingechaũgücü rü tá pemaã nüxü nixu i chauchiga. Rü nüma nixĩ i mexëchicü ja chorü ngũxëëruũ jiixũ, rü nüma nixĩ i wüxigu chamaã naxüãxü i tóru Coriarü puracü. ⁸Rü nhuxma rü petanüwa chanamu na pexü nataãëxëxũcax rü

pemaã nüxü jaxuxũcax na nhuxãcü toxü nangupetüxü i tomax. ⁹Rü Tíquicumaã petanüwa chanamu i Onëchimu i taeneë ja nüxü ingechaũgücü ja aixcuma meã Tupanaãrü puracü ücü. Rü nüma nixĩ i petanüxü jiixũ. Rü nümagü i ngëma taxre rü tá pemaã nüxü nixu i guxũma i çacü na ngupetüxü i nüma. ¹⁰Rü pexü narümoxë i Aristácu i wüxigu nuxma chamaã pocuxũ. Rü ngëxgumarüũ ta pexü narümoxë i Marcu i Barnabéeneë ixĩxü. Rü marü pemaã nüxü chixu i Marcuchiga na meã penajauxgũxũcax i ngëxguma petanüwa nanguxgu. ¹¹Rü ngëxgumarüũ ta pexü narümoxë ja taeneë ja Ngechuchu ja Juchugu aëgacü. Rü ngëma tamaëxpüx i jatügü rü ngëxícata ma nixĩ i Judëgü i jaxögũxü i wüxigu chamaã puracüexü i Tupanaãrü puracüwa. Rü nümagü rü poraãcü choxü nataãëxëëgü. ¹²Rü ngëxgumarüũ ta pexü narümoxë i Epáfra. Rü nüma rü petanüxü nixĩ, rü aixcuma nanaxü i Cristuarü puracü. Rü nüma rü norü jumuxëwa rü guxũguma Tupanaxü nacaaxü pexçax na aixcuma meã pemaxëxũcax rü pejaxögüamaxũcax rü aixcuma penaxũxũcax i ngëma Tupana naxwaxexũ. ¹³Rü chama rü marü nüxü chadau rü pemaã nüxü chixu i nhuxãcü Epáfra poraãcü pexçax napuracüxü rü naxçax napuracüxü i ngëma taeneëgü i Raodichéaarü iãnewa rü Iráporiarü iãnewa ngëxmagüxü. ¹⁴Rü Luca, i duturu i nüxü ingechaũgüxü, rü pexü narümoxë. Rü ngëxgumarüũ ta pexü narümoxë i Dema. ¹⁵Rü chanaxwaxe i nüxü perümoxëgü i taeneëgü i Raodichéawa ngëxmagüxü. Rü ngëxgumarüũ ta chanaxwaxe i nüxü

perümoxëgü i Nifa rü guxüma i taeneëgü i jaxögüxü i napatawa ngutaquëxegüüxü. ¹⁶Rü ngëxguma marü nüxü pedaumatüguwena i nhaã popera, rü chanaxwaxe i Raodichéawa penamu na ngémacüāx i taeneëgü rü ta nüxü nadaumatügüxüçax. Rü ngëxgumarüü ta i ngëma popera i Raodichéawa chamuxü, rü ngëxguma pexütawa nanguxgu rü chanaxwaxe i nüxü pedaumatügü. ¹⁷Rü chanaxwaxe i

Ariquípumaã nüxü peixu, rü nhapegügü nüxü:

“¡Rü meã napuracü rü janguxëë i ngëma puracü i tórü Cori cuxna äxü!” nhapegügü nüxü. ¹⁸Chama i Pauru rü çaxmëxmaätama pexçax chanaxümatü i nhaã chorü moxë. ¡Rü nüxna pecuaxächie na chapocuxü! Rü chanaxwaxe i Tupana pexü narüngüxëë.

*Rü nuãma pexna,
Pauru*